

四庫全書

集部

欽定四庫全書

集部  
明詩綜卷十五至  
七

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷十五

翰林院檢討朱彝尊編

周致堯

四首

致堯字煥文崇德人平江書院山長有山長集

靜志居詩話山長舊有鈔集存崇德縣學有閩人知縣事者携之歸遂失傳今所存者構李英華湖海耆英集所收一二而已曹能始石倉詩選載山長詩較富或在閩得觀其全爾予反高念祖謂予山長名渠以字行而蔣布衣楚辭則云字煥文致堯其名攷陳緝熙文有送周煥文

從唐伯剛之吳興作疑  
布衣之言得其實也

懷古

我愛陶淵明所居惟種柳與世實寡諧  
委懷在杯酒不  
有千古心誰識千載後意欲從之游  
斯人復何有

夏夜宿流虹寺有感

馳驚竟朝暮似緣飢凍迫如何百年間區區為形役  
世  
塗寡相知覲顏徒自飾所獲既非實所喪良可惜  
生理  
固草草進退量我力聖道卒未聞怛焉增內惕

西津夜泊

孤帆夜落石橋西  
橋外青山入會稽  
卧聽海潮吹地轉  
起看江月向人低  
一春衰謝憐皮骨  
萬國艱虞厭鼓鼙  
何處商船歌水調  
令人歸思益悽迷

寄沂陽劉廷鎮員外

故人相與最從容  
尚憶論詩向一作五夜中  
白首無家千

里別青山何處一樽同  
夢回孤館燈前雨  
目斷西風塞上鴻  
誰識離懷愁絕處  
野亭依舊穆陵東

劉 渙 二首

渙字彥亨紹興山陰人至正間薦授三茅書院

山長道梗不赴平于洪武間

詩話彥亨受學楊門不離書樓舊染

絕句 二首

白玉搔頭金步搖春衫紅勝海棠嬌只因記得當年事

重到桃花第四橋

鬢薄雲鬆綠霧涼春風額點麝臍黃背人撲得雙胡蝶

滿扇薔薇露水香

凌雲翰 二十首

雲翰字彥翀錢塘人元末蘭亭書院山長洪武

初以薦授四川成都教授有柘軒集

瞿宗吉云先生兼工

諸作不以一善成名 陳光世云柘軒詩諸體悉備莊敬而不褻和樂而不淫雖無刻苦麗密之工而平易典則發乎情之自然有足觀者

詩話柘軒學於陳衆仲故其詩華而不靡馳騁而不離乎軌五言如陪祭作七言如鬼獵圖才情奔放不可羈勒直可奪都離之旗摩青丘之壘集中與張行中論詩云艱深文淺近臭腐化

神奇每到真成趣由來  
不費辭其自得之深矣

奉和許彥章檢校陪祭有作三十韻

學古始入官為有民社寄此理均人臣矧職居相位祀  
典遵百王法守由一揆丘陵以為壇陶匏以為器既嚴  
神祇稱復辨上下次成象本乎天成形本乎地牲牢貴  
膾充禮樂尚明備瞻仰民所從財用國攸繫兩儀同乾  
坤七廟異渙萃日臨齋戒期卜叶享祀利不愆斯不忘  
能備乃能祭皇風浩無垠盛世寧有替於時螯蟲驚應



候玄鳥至風霆為昭明山川載神氣鏗鏘鳴鼓鐘秩秩  
陳簋簋翩然靈之來允矣誠所致有美文武臣夙抱純  
一志燎明夜向晨月白天在水鵠立儼當中駿奔走其  
際欣欣神樂康簡簡福相熾湛露流玉階冷風襲瓊佩  
方當感格時已著充滿意禮行士無譁樂奏神所益益  
之以十朋介之以繁祉祈報止春秋敬恭止壇壝玉燭  
一鼎調金成萬寶遂三獻迄有終九府均被賜豈期康  
衢民獲覩放勲世雷動車馬還日出海波沸作詩聊記

年皇明甲寅歲

送趙永貞改丞德化縣

舟行何遙遙南風颺旗尾江上無雜花青青盡蘆葦于  
時潮已平波動日光煒中流雙鷁鳴愛此兒郎偉餞行  
豈無詩成章媿其斐會看展驥足如公信無幾

画菜

高田宜種蔬下田宜種穡歲饑與饑同安敢望肉食雨  
餘理荒畦甲圻資地力會看根本長取之戒勿丞天公

憐我貧此物頗不啻便如終歲謀十甕擬可得含笑披  
畫圖流涎欲霑臆長能齧菜根天下無此色

趙大年蘆鴈圖

平林帶煙波渺渺風低葭莢秋聲小望中疑是彭蠡湖  
十百為羣盡陽鳥楚天未雪無雨霜南來豈必無稻粱  
哀音若訴雲路迴老翅不厭闕河長汀洲水落成平陸  
散亂鳬鷺聚沙曲低飛不肯伴寒鴉猶繞荒村破茅屋  
屋中有客揮五絃從之不得心茫然何人畫圖能著此

趙氏丹青稱大年徽廟元年頌鳳歷此圖正是當時迹  
便從宣和到靖康艮岳禽聲起秋夕古往今來幾盛衰  
摩挲老眼竟成悲良工心苦人莫識似寫周宣鴻雁詩

包山翫月次瞿宗吉韻

昔我曲江觀怒濤越山不及吳山高如何古有任公子  
一釣乃能連六鰲我今杖藜尋翠麓地有白雲人不俗  
丹房火冷碧窗虛夜半秋聲撼林竹踏歌連臂下仙壇  
目斷西山吳彩鸞桂花飛簾作香雪轉首便覺秋闌珊

人生懽樂難再得始信光陰如過客陶令空披漉酒巾  
謝公謾著登山屐菴前堵牆如白虹洞門不掩來江風  
分師半席師已許經筵蠟燭搖秋紅郊何為寒島何瘦  
新雨能來寧論舊今宵爛熳得好晴知是何人補天漏  
少壯而老理則常胡能不死彫三光放麕西已誠不悲  
歌鳳接輿無乃狂茲游可繼五君詠祀事同陪匪乘興  
中庭坐待明月來樹影團團一時竝

關山雪霽圖

前峰後峰雪糝糊東村西村春有無快雪時晴入佳想  
況復見此關山圖關山迢遞相聯屬玉潔珠光眩人目  
扶桑飛上金畢逋暗水流漸度空谷野橋行過路三义  
青旗插檐沽酒家驅驢倦客得少憩悵望遠道還咨嗟  
詩翁好事常起早天寒祇恐梅花老柴門時有故人來  
階下白雲須用埽此圖一日落塵寰筆法依希荆與關  
人生遠遊固云樂何似在家長看山我本識字耕夫耳  
占祥便作豐年喜田園歸隱會有時麥飯飽餐茅屋底

送謝鐵厓游龍虎山

有美人兮懷遠遊逍遙九州復九州暫來淮楚與吳越  
五雲飛上千金裘八公山在淝水上草木尚若森戈矛  
澄江如練誰解道况聞好鳥喧春洲東山薔薇幾回落  
昔人何處青苔稠錢唐故宮盡禾黍帝子一去江空流  
客兒亭前高興發便欲著屐窮深幽天雞三鳴更五點  
海日湧出黃金蚪瑤笙聲斷白鶴遠知有子晉從浮丘  
蟠桃開花今已實似許方朔重來偷如何去作龍虎客

遠慕漢代張留侯我聞仙翁號虛靖草菴宛在山之陬  
長乘丹光翳彩鳳或有紫氣垂青牛子能候之問至道  
黃庭內景非難求四方上下遊已遍歸來十二仙人樓  
樓中長嘯弄明月握手一笑三千秋

陳居中進馬圖

明王慎德蠻夷賓尺天寸地皆王臣遠人重譯貢龍馬  
流沙萬里來麒麟金丸聲動佛郎國寶劍氣接明河津  
不知何年離榆塞但見此日朝楓宸毛駟生來玉琢鼻



錢驄隱起花攢鱗最後赭白信無敵如此丹青疑有神  
騰驤欲飛使者喜控制不得奚奴嗔我聞陳閱善匠意  
無乃韓幹為前身按之圖中得所似惜哉世上遺其真  
驪黃牝牡不易索九方皋後知何人

鬼獵圖

終南進士乃好武野魅山精皆部伍蒐田也欲從四時  
作氣恍如聆一鼓銅鉦先鳴地欲裂阜蓋後張風為舉  
蹇驢足跛不受鞭良犬尾搖何用組錦條未許縱蒼鷹

鐵絙猶能縛玄虎跳踉衆鬼為卒徒矍鑠一翁作謀主  
或為狼顧背拔鎗或作猱升前試斧鷓鴣鳴口應已張弓  
蛇偃肩擔來穀弩身憑大盾宛轉遮手弄飛槌高下舞  
坐作擊刺衆莫當進退超驤孰敢侮猙獰似覺口吐牙  
輕捷渾疑臂生羽逐禽不假御車輿獲獸何勞施網罟  
亦如塵世有司存頗類神仙足官府画工後輩效前人  
戲筆何年追舊譜已無吳生名擅場復有顏輝好奇古  
周易取象車載一韓子送窮名數五如斯情狀不易知

更欲形容亦良苦且須留取作歲除竹爆一聲春滿宇

詩話画終南進士者南唐周文矩蜀石恪汴京楊集其初類設色為之至龔高士聖予易以深墨其法師趙千里丁香鬼離奇變化目此書家草聖於是詩林多作長歌自聖予而外若宋子虛李鳴鳳王肖翁韓性陳叔方楊廩夫李宗表劉伯溫各事摹寫要未若柘軒之淋漓盡態也

### 鍾馗画

北風吹沙目欲眯官柳搖黃拂溪水終南進士倨然起  
蝟磔于思含缺齒袍藍帶角形甚傀烏帽裹頭髯露指  
白澤在旁口且哆馴擾不異麟之趾手持上帝書滿紙

若曰新歲錫爾祉一聲竹爆物盡靡明日春光萬餘里  
湘湖草堂為貢友初賦

湘湖卜宅似江郊梅柳同栽已放稍春雨漏時愁在屋  
秋風怒處憶飛茅蕙絲流滑羹長用荷葉分香飯屢包  
買得扁舟梭樣大呼童繫在石塘坳

清江文會詩為崔驛丞賦

清江之水如練澄盍簪此地皆良朋一錢尚懷會稽守  
二松好效藍田丞忘機鷗鳥偶在座入饌鱸魚還可曾

蘭亭陳迹在圖畫新詩莫惜傳溪藤

林塘幽乃會稽陳惟賢軒扁又號西疇因贈詩

賀監湖頭一曲開林塘幽處著亭臺青山在上水在下  
黃鳥自啼鷗自來碁局不移長對奕酒船纔放即銜杯  
會稽我昔曾遊地杖履何時得重陪

曾瑞卿所作山水圖

山闌迢遞野橋斜策杖幽尋豈憚賒路轉峰回連佛寺  
雞鳴犬吠隔人家白雲作雨多如絮紅葉驚風少似花

不是褐夫能貌得空令泉石老煙霞

夏日書懷次沈欽叔韻

黃梅子熟暑蒸潤冬青花開雲作陰昨宵北牖雨聲急  
明日西湖流水深論才子建得八斗換酒太白輕千金  
幽懷欲寫託長句又聞綠樹新蟬吟

送孫敬義還鄉

孫綽曾聞賦遂初陶潛亦復詠歸與田園偶爾成圖畫  
道路依然畏簡書老去還鄉非是速醉來題句未為疎

翻思映雪寒窗下客夢時時到故廬

岳鄂王墓

前相汪黃後相秦力圖恢復竟何人  
朱仙路近旌旗晚  
古汴城高草木春  
江月照空蘊劍獄邊沙遮斷  
屬車塵  
棲霞嶺下將軍冢  
夜夜悲風起石麟

題画

山雨忽開霽溪流繞茅屋時有濯纓人  
雲端看飛瀑

次徐總制韻

燕子來時花滿城  
海棠絲雨半籠晴  
行人最愛西湖水  
流入官河也自清

劉文質松溪小像

為聽松風直過溪  
長琴分與小童携  
白雲不隔天台路  
千樹桃花一鳥啼

胡奎六首

奎字虛白海寧人  
寧府教授有斗南老人詩集

詩話虛白泊舟鄱陽望湖亭見石刻東坡黑雲  
推雨未遮山絕句次韻和之書之於壁俄見一



叟來誦其詩曰子非斗南老人邪乃為長揖回  
顧不知所之因以斗南老人自號高青丘贈胡  
校書詩所云巖美明月琵琶洲者是已其詩功  
力既深格調未免太熟誦之若古人集中所已  
有者吾鄉雲東逸史曾手書其稿舊藏項氏天  
籟閣繼歸高氏稽古堂今為華山馬思贊所藏  
余借觀錄其六首

### 秋夕

月出萬井秋商聲在高樹風條絡緯鳴露葉流螢度天  
河一杯水流向西南去坐念素心人佳期渺何處

### 吳江月夜汎舟

餘霞歛遙岑微靄生近浦江行得涼夜月出鳴柔櫓茫  
茫天欲浮歷歷星可數水螢乍明滅沙禽或翔舞此意  
與誰同三高渺千古

駕湖舟中翫月

團團三五月挂在駕湖東方舟汎流光坐我青天中低  
頭看月月在水倒影姮娥呼不起三更露下芡袍涼恍  
然濯足銀河裏城南斗酒真珠紅與月共醉鮫人宮醒  
來月落不知處張帆且趁清明風

吳江竹枝詞 三首

青裙女兒雙髻螺  
唱出吳宮子夜歌  
酒醒月明眠不得  
秋風吹起太湖波

第四橋邊楓葉秋  
青裙少婦木蘭舟  
月明打槳唱歌去  
驚起蘆花雙白鷗

西山日落東山黃  
儂唱竹枝行晚涼  
十幅蒲帆弓樣滿  
南風吹送白龍堂

李延興

十七首

延興字繼本東安人占籍北平至正丁酉進士授太常奉禮兼翰林檢討洪武初屢典邑校有

一山集

詩話一山北方之學者其詩文頗拔俗長歌尤擅場洪武中雖未仕于朝集有與友人書云從東安丞李遂招致親夏楚事未幾逼為訓導又有移教房山留別雄縣周尹詩又涑水縣學記云延興猥以謏才代匱學職又自叙云洪武戊午永清劉宰招致攝其鄉學則其典邑校者屢故自贊画像有云雖同乎今之人而以聖賢為矩墨雖食夫今之祿而視軒冕猶泥塗然一山本元進士而上總戎詩則曰大將軍出沙漠萬里河山盡開拓復其名王歸四面凱聲作功成

獻俘蒲萄宮天清日白開洪濛遂使樓煩之壤  
化為冠帶衍為提封未免言之太盡無復一成  
三戶黍離麥秀之思矣

### 江皋圖

江晚月未上白煙滿芳洲雨止山氣佳衡扉在巖幽浦  
迴沙漫漫松深露浮浮水田早稻熟稍欣獲有秋曠爽  
來清風朱夏炎歊收野人樂江居垂綸水西頭得魚送  
鄰家酒好仍見留童仆喜相隨浩歌送蜚鷗古時放達  
人傲睨輕王侯焉能繫塵鞅憧憧為身謀

壁間雜畫

山中之人氣奕奕愛畫雲山與水石遠山近山恣一揮  
頃刻生綃數十尺今代只數高尚書妙處不減米家筆  
後之善畫者為誰青山白雲久蕭瑟忽驚座上煙靄生  
漠漠平林翠如織平生夢想不可到乃在君家雪色壁  
花發窮林破曉紅水合長天蕩晴碧蘆邊鴈影落迴汀  
沙上漁蓑曬斜日白髮蒼顏四老人棋罷松間坐爭席  
筍皮笠子大如織歸去不愁山雨濕爐絰九轉鍊丹成

杖挂百錢沽酒喫眼看此景不可親  
况復憧憧事塵役會須結屋山之阿  
更求好田水之側野人生理日有餘  
耕歸牛角懸書帙茅檐夜火促寒機  
古甸秋風收晚粟安車若便下丘樊  
為勸先生不可出

松雪翁畫馬

西海之西天地翕合敷靈氛天產天骨超崑崙  
月窟而東而北幾萬里是馬乃能躡星辰踰渤澥  
埽空翼北凡馬羣曹將軍是開元以來善畫者  
蚤以絕藝動紫宸不

問驪黃與牝牡筆力到處春無垠往時常見一二本世  
之畫者徒紛紛吳興學士昔在詞林館畫人畫馬咄咄  
能逼真玉堂朝日射碧瓦瑣窗晴雪吹青春文章之暇  
奉詔寫龍種冰絹萬幅清無塵此圖神采更飄逸妙處  
不減曹將軍飛雲滿空散靈雨五花凌亂曉濕蒼龍文  
人言此是明皇御愛者天香瀟鬱飄滿身瑤池渴飲雪  
澆養霜蹄迴踏雲嶙峋黃鬚圉官似是太僕張景順自  
幼調馬馬亦馴想當牽來赤墀下皎如飛龍下天門山



齋看畫白畫靜丹粉如沐清心魂龍媒一逝九霄隔龍  
沙泱泱霜風昏縱今有馬無善畫誰與寫之傳世人吳  
興自有古作者高風遠韻不可聞九京安得起公死請  
公為我放筆電埽層空雲陳君愛畫不弱南金與西玉  
百迴展玩當爐熏南金西玉可力致嗟此神物戛然獨  
立而無鄰烏乎神物為物固有神直恐變化為龍飛上  
清都紫微之帝闈

石鼓歌

乾坤清淑之氣蛻螭扶輿亘西極化作岐山之陽石鼓  
十六丁二酉剗斷崑崙之瑤峰縹緲雲根墮碧層崖  
秋碎方祇愁大星宵隕圓靈泣中虛不露疏鑿文太素  
猶涵渾沌質偉哉周家宣王中興時戈鋌彗雪九縣一  
明堂受朝羣后来天威不違顏咫尺岐陽之狩載揚國  
之靈王氣騰霄何赫奕八鸞聲戛秋風高九旗光動朝  
暉赤歌車攻詠吉日張皇維昭帝續泰山盤石之祚炳  
烈千萬春勒之貞珉古無匹其形如鼓不可叩之鳴其

體渾朴絕似大造無痕跡其字道逸宛是篆與科其文  
古雅髣髴周之什吉甫歌史籀筆制作森嚴照其邑年  
多物化理則然金字半滅無人識老蛟摧裂野火焚古  
墨淋漓苔雨蝕青城學士昔在大德初見之林下久歎  
息入朝亟為丞相言如此至寶何可以棄擲大車彭彭  
輓致來孔庭天地風雲亦動色我嘗愛此十鼓文字奇  
撫玩摩挲不知日之夕荏苒光陰數十春春風吹愁髮  
生白近時再過石鼓旁階草蒙茸沒雙屐細看字畫轉

么麼徙倚迴廊淚霑臆東安鄧尹彈琴清桂林議論文章脫塵格平生好古如古人直欲蒐扶周秦之故實里中更有朱先生白首著書窮日力寄書遠訪石鼓文細字滿箋珠的皪書中宛宛見高情識者見之爭愛惜乃知先生好古不減吾鄧侯吾徒委瑣豈復如先生喜新厭舊猶戲劇吾友秦郵李希文新來小篆亦傑出夷門梁君子宜苦學張顛之草書電埽千番爛如拭我生雅恨不能書每見名家如有失朱先生古遺直甚欲相從

不可得山中茅屋書滿牀何時一到虛軒分半席直須  
和我石鼓歌戰退蘓韓入堅壁烏乎古之作者往往苦  
用心豈惟杜預雅有春秋癖今人無復見古人徒勞紙  
上賞遺墨魚目滔滔久混珍後來此鼓誰收拾燕之石  
等圭璧荆之璞同瓦礫古風不返天茫茫何如爛醉林  
皋卧苔石

雙鶴吟

若有太古之仙迺在瀛洲之上方壺之間門前雙鶴不

知幾歲月雪飛風舞迴隔青雲端天空月白雙影靜玉  
笙合奏瑤臺寒石壇暝踏松子落林溪晴咏苔花殘仙  
翁手執相鶴經一卷逸思汎若孤雲間興來引雙鶴笑  
入三茅山三茅山中瑤草碧九皋雨散春煙濕鶴飛亂  
點層峰青彩鳳蒼鸞往往與相識價重不減雙南金質  
瑩不弱雙白璧不慕懿公之華軒不逐王喬之飛舄不  
巢西湖處士之孤山不憩黃州謫仙之赤壁棲紫霞護  
丹室六翮凌層曝朝日友茅君呼木客盡日聽琴香案

側山中之人問訊時相過蟬聯飛繞羊公石鶴之逝風  
翩翩遙空雲落秋無邊鶴之返山娟娟紅塵不到芸窗  
前恍如元方季方在潁谷倏如陸機陸雲來洛川燦如  
同穎之禾敷秀唐叔壤宛如王睢之鳥著美周南篇薛  
公之鶴何其夥趙抃之鶴何其偏異哉兩位骨不偏不  
夥全其天問鶴往時託巢在何許邈在遼海之東華表  
柱問仙豢鶴到今凡幾春前五百年嘗與令威一相遇  
鶴飛來向何所不渡海之涯不涉江之浦直欲飛近天

上神仙之官府天門寥濶不可通誰到十二瓊樓最高  
處鄧林之廣豈無一枝之可棲何為乎涉雲霄冒風雨  
春去秋來恣軒翥仙亦竟不留鶴亦更不駐山邪鶴邪  
笑我覺覺於風塵相隨直上青雲去

早過五門

二首

曙色動高城鐘殘樾馬鳴千門春放暖十日雪開晴  
勲業非吾事詩書寄此生青衫王粲老猶欲俟河清

霜白掖樓曉寒鴉城上啼微雲閣闔外斜月建章西憂



國心常切成功計轉迷十年京闕下貧病尚羈縻

丙申歲詠懷

三首

白首殊方客奔馳戎馬間時危憂母老歲晚寄書還  
雪連荒野寒雲出亂山蒼茫西日外痛哭寄柴關

辛苦憐吾弟荒山久避兵素書連月斷白髮滿頭生  
雪翳窗燈影風沉戍鼓聲寸心憂百結寂寞度殘更

妻子何時見淒涼病轉侵虛傳千里信已負百年心  
茅屋飛霜滿空階落葉深白頭吟正苦回首淚霑襟

贈境上人

山館夜蕭蕭天寒酒力消  
鴈行衝雪斷燈影隔江遙  
渡口人爭岸船頭客待潮  
倦塗誰慰藉風景不相饒

晚出

短策扶衰病輕衫受晚風  
煙花連浦白霜葉墜林紅  
骨肉兵戈裏乾坤涕淚中  
飄飄江海上回首媿漁翁

自述

八口淒涼生事微中原羽騎日霏霏  
天寒歲晚歸難定

水遠山長信轉稀  
青眼故人頻送米  
白頭慈母尚縫衣  
蕭蕭漢渚蒹葭老  
好向兒時舊釣磯

河上

宛宛寒山入暮煙  
河流直到寺門前  
店頭買酒風吹幔  
浦口叉魚雪滿船  
翻覆世情堪大笑  
寬閒野屋得清眠  
虛堂月色明如畫  
獨坐清彈五十絃

京口夜泊

醉客滿船歌月明  
隔江燈影逐人行  
帆衝雨脚迴京口

鐘送潮頭打石城南渡衣冠愁北望東皋簫鼓報西成  
桑田海水依然在不管人間有變更

### 沙河

沙河市頭黃葉飛沙河道上行人稀天陰古冢狐狸出  
雪滿霜田鴈鷺肥百錢魯酒足供醉十歲奚兒能打圍  
別家三月不得信關塞蕭條何日歸

### 別易水諸公

一家遠隔萬重山古道人稀獨自還夜月屢傾燕市酒

春風又渡鴈門關  
晴天雨散千峯外  
野屋雲生半席間  
兄弟何時重會面  
燈前相對話時難

袁華  
三首

華字子英崑山人  
洪武初府學訓導  
有可傳集

詩話子英名其集曰可傳東維子序之曰吾鐵  
門稱能詩者南北凡百餘人求如張憲及袁華  
輩者不能十人又題呂誠敬夫詩曰蘇支邑凡  
六獨崑山多才子魁出者往往稱呂袁子英敬  
夫也然其序鄭韶九成詩則曰吾求之東南永  
嘉李孝光錢唐張天雨天台丁復項炯崑陵吳  
恭倪瓚有本者也近復得永嘉張天英鄭東姑  
蘇陳謙郭翼而吳興得鄭韶也序郭翼義仲詩

曰合吾之論者斤斤四三人焉蜀郡虞公集永嘉李公孝光東陽陳公樵其人也繼其緒餘者亦斤斤得四三人焉天台項炯姑蕪陳謙永嘉鄭東崑山郭翼也顧子英不與焉然則東維子之餘論固無一定矣東維與李五峯論詩謂梅一於酸鹽一於鹹食鹽梅而味常得於鹹酸之外若子英之詩僅一於酸鹹而已義仲卒于至正二十四年朱珪名蹟志載有盧熊墓志可以為據或者乃云洪武初徵授學官度不能有所自見怏怏而卒誤矣

和鐵崖先生蹋踰篇

治家女兒髻偏梳教坊出入不受呼  
麝金小襪飛雙鳧  
飛雙鳧曳雙袂玉圍腰珠絡臂

哀宋姬

有序

宋姬者宋肅王樞之女也幼戲水濱得玉印一  
文曰金妃之印靖康遭俘入京金主納之為妃  
或云符印之識夫父讐不共戴天况國亡家滅  
之餘猶委質以求全者君子不取也吾觀姬之  
心則不然欲求其死以不死耳故甘屈身為巾  
櫛之侍箕帚之奉冀一言以悟主聽庶幾二帝  
生還雖血濺金庭骨糜鼎鑊亦不惜也否則蓄

謀藏機俾其禍生於社席間以雪大辱大恥然則不幸而誅戮雖死猶不死也至後又徙二帝於五國城姬驥諫而主怒以匕首殺之予哀姬之志不得伸而嘉姬之死得其所嗚呼處變而不失常道者其惟宋姬乎迺作辭以哀之其辭曰

膏吾車以北征予歷黃龍之故城山川蚺蜺以盤鬱予實完顏氏之所京當二世之雄特予日從事乎兵革何



靖康之多難兮身降庶而竄  
亟維肅王之有女兮亦俘  
累而在行符玉文之印識  
兮充下陳於蘭房甘伏節而  
委命兮羌殺身其何益俟機  
隙之或可乘兮雖九死而不  
惜彼得雋而神怡兮又將徙  
二帝於窮山之陰昧大義而  
共戴天兮荃不媿於中心陳  
謹言之謇謇兮諫不從而繼  
以死也何彼蒼之不鑒其忠誠  
兮竟捐生於寸匕也噫吁身既  
失兮讎不能復謀弗克兮遭殺  
戮河流湯湯兮征鴈肅肅泰陵  
兮拱木金源兮走鹿些吾辭兮

弔貞淑魂其歸來兮故國

谷叶

客海津送郭秀才

草低沙軟見牛羊  
煙霧蒼茫落日黃  
燕女如花不相識  
笑傾馬潼勸人嘗

殷奎

奎字孝章一字孝伯崑山人  
洪武初以薦例授州縣職  
以母老請近地忤帝意除咸陽儒學教諭卒於官門人私謚曰文懿先生有支離彙婁

曲叢稿

絕句

霜落水禽啼寒流遶大隄長魚不受釣躍過石梁西

邵亨貞十一首

亨貞字復孺嚴州人徙居華亭明初為松江府

學訓導有蛾術集

詩話貞谿詩辭氣和易比於袁景文管時  
敏則不及方諸陶九成顧謹中似為過之

送傅子初先生之信州錄事

去年十月交冬淺寒輒涸客居江城館燈火在風露君  
從錢唐來舍舟縱游步一見心為開問勞出情素番陽  
與雲間相望千里路會合非偶然況是夙所慕江左古  
世家粲粲美風度射策衣繡歸春生五陵樹文章天機  
錦到手眩昏瞽坐談極疇曩歡然獲知遇自冬更徂春  
不間朝夕晤君於稠人中走獨心所寓傳舍稍密爾泥  
滓亦枉顧開卷析疑義沛然決東注賞音風雅間神會  
見天趣平生耿耿懷不為流俗具因君頗呈豁欣快未

易喻誓將與此老結納視親故款洽豈有極忽復報瓜  
戍錄曹雖民職未足展抱負行者崇令德政化藹先務  
分違坐契濶引領不可遯中年別親友作惡若深忤梅  
風彭蠡寬歸鷁慎速渡後約仍綢繆中情尚能賦芳洲  
蹇誰留懷哉美人暮

沙湖

凌晨出沙湖杲杲寒日赤望路指西南起風挂帆席行  
行數里間舟底盡沙磧歲暮寒水落過者總煩劇篙師

力支撐進寸乃退尺叫呼問鄰舟始得指所失中流植  
荊葦表以深水迹由茲遂無阻四望始充斥迢遞達岸  
旁回首日已夕嗟予匪徒行衰謝牽物役人生苦多虞  
仰羨投林翮

青梗

夜寒宿秣陵曉霽度青梗旁臨總溝壑不啻瞰胥井俯  
視層冰橫照目光炯炯興人亦良苦交馳畏肩竝霧昏  
迷轍迹有力不敢騁我時舍車行履滑不憚整股憂莫

暫置懷抱常耿耿山川不我厭衰晚負清景何當問蒙  
莊寸心若灰冷

寒食次雲翁韻

春信催玄鳥客愁聞杜鵑一村寒食雨三月杏花天物  
色知誰賞風光亦可憐西湖長入夢人在采香船

還家舟中口號

人語荒村晚船行逆水風平燕鷗外綠落日鴈邊紅奔  
走生涯拙歡娛往事空故園看漸近喬木有無中

橫渚雜言

廣厦人來少青山遠對門緩潮通曲港高樹接遙村井

記袁崧宅鄉連宰我墩行吟聊適興心迹未須論

袁崧宅宰

我墩皆在數里間遺迹存焉

橫溪夜思

宿霧隨雲歛寒星著水明客舟移遠岸戍柝報初更老  
覺馳驅倦愁思喪亂平故人難泰約歲晚更多情

貞溪初夏次南金韻

四首



雨後深林竹筍肥  
渡頭風急柳花飛  
柴門不掩綠陰靜  
人在閒窗試苧衣

巡檐燕子掠晴絲  
隔塢茶煙出院遲  
草色入簾人不  
到  
午風吹暖夢回時

棟花風起漾微波  
野渡丹橫客自過  
沙上兒童臨水立  
戲將萍葉飼新鵝

小巷縑車霜繭熟  
前村社鼓野人來  
鶉鳩聲在樹陰裏  
竹下柴扉晝不開

虞堪 三首

堪字克用一字勝伯宋丞相雍公八世孫家長

洲洪武中為雲南府學教授有鼓柷稿

詩話勝伯避兵苙澤吳興施縉為創義塾延以  
為師趙郡蘓大年會稽姜漸為紀其事又力購  
雍公遺文刊行一時名士若遂昌鄭元祐吳郡  
沈右呂楨王謙周砥邵奕豐城余詮魏文彞會  
稽韓友直陶澤高平范成張緯王廓臨邛魏奎  
河東王璩蘓丘聶鏞太梁申屠衡蜀王立中黃  
夔咸賦詩美之今雍公集終無傳惜  
矣鼓柷集中題松雪画一絕持工

踏車謠

一春多風復多雨田頭踏車最辛苦去年種田田無收  
還租賣却牛一頭今年城西盜賊起北巷南村盡燒毀  
城頭土崩日夜修壯者服役老者憂晨食糟糠每忘晝  
妻子長飢面皮瘦公家喫酒歌呼奴不念農家租不敷  
公家若念農家苦水滂祈晴旱祈雨

題錢舜舉畫蠶桑圖

桑中鳴琴巧如鴉吳娘養蠶夜不歇暖雨寒風惱殺人  
正是江南三四月苕溪遺老白髮翁  
畫蠶畫葉搖春風

千金難買吳孃笑故寫生枝榭子紅

題趙松雪畫

王孫今代玉堂仙自畫茗溪似輞川如此青山紅樹底  
可無十畝種瓜田

顧祿二首

祿初名天祿字謹中松江華亭人明初以國子  
生除太常典簿遷蜀王府教授有經進集

解大紳云

謹中詩噓吸風雲奔走造化張汝弼  
云謹中詩雄肆疎奇簡知高皇帝宜也

秋夜

一寒一暑相推移四序平分秋暑悲山川蕭條草木萎  
金風淅瀝吹羅帷夜何長兮晝何促欲眠不眠歎幽獨  
樓上寒更聲斷續飛蛾翩翩燒殘燭

題王叔明所畫松下奕棋圖

十日一水五日山王侯妙筆無荆闕山如蒼龍騰入霄  
漢表水似白虹湧出溪潭間長松直下有巨石風雨剝  
落莓苔斑兩翁對奕盤礴坐其上笑語自若終日無愁

顏飢來豈待事煙火瑤草紫芝俱可餐不知何年修習  
到此地知有神仙境界無人窺我今讀書三十載抗塵  
走俗猶未閒問翁不語愈覺心自恚高風逸韻邈矣終  
難攀安得翁能示神異授以九轉入爐丹圖中之景果  
然真有否便欲御風一去何須還

曹孔章一首

孔章字子文長興人官府學教授

閒齋書事

林響溪雨來蕭蕭客窗暝瑤琴倦不彈石闌晚猶凭煙  
深鳥依樹花落風滿逕隔岸誰誦經泠泠發清磬

朱昇一首

昇字彥升無錫人洪武初舉明經任本縣訓導  
陞上虞教諭

擬古

霜露悴百草蟋蟀鳴聲悲朔風寒以厲良人久無依時  
服委深篋路遠難致之仰視投林翮還依故巢飛物性

有如此念君歸無期  
初當苦寒節坐傷音問違

周 启 一首

启字公明號溪園史吉安人訓導

夏日雜興

一片殘紅落紫苔  
笙歌無夢到樓臺  
山雲晝鎖石橋斷  
溪雨夜添春水來  
江上客扶歸馬醉  
柳陰人喚打魚回  
不知上苑花開否  
無分行看羯鼓催

黎 貞 一首



貞宇彥晦新會人洪武初舉邑訓導不就坐事  
戍遼東尋放還有林坡集

詩話林坡為孫仲衍門人仲衍就誅解衣裹尸  
負其棺萬里歸葬鄭巨君而後不多見也陳公  
甫云高山景行吾鄉先輩黎林坡一人而已其  
推崇若此詩多庸寔予游嶺南借得鈔本錄其  
一篇

### 行路難

君不見天上浮雲任舒卷白衣蒼狗須臾變又不見瞿  
唐嘈嘈水倒流奔湍激石能覆舟人情有時亦如此紛

紛輕薄何足比平嘗意氣同死生急難何堪託終始嶺  
南狂客宴且貧長將青眼待時人豈知此道不足貴翻  
使皋鶴儔羣雞不如託身與鷦鷯蓬蒿之下同逍遙

鄭

澐

三首

澐字起深黃巖人洪武末為樂清訓導有直正

齋集

詩話廣文詩不  
多傳跌宕自喜

客夜

西風蕭蕭木葉稀秋深作客何時歸城頭月出照擊柝  
江上露寒催擣衣燕鴻附書孰可致烏鵲繞樹還驚飛  
三更不眠欲起舞躍馬卧龍誰是非

梁家堰

梁家堰頭桑扈啼早潮帶雨草平堤煙中碧樹依江重  
天外浮雲接海齊客店上帘沽白酒商船結纜度青泥  
十年猶在江湖上何處經行無鼓鼙

劉氏菴

風急落花紅滿林孤村月色晝沉沉一百五日寒食近  
七十二橋湖水深世路難行甘屏跡鄉關入望苦經心  
古今萬事知多少抱膝聊為梁甫吟

吳舜舉

一首

舜舉字士源歙人洪武初以耆儒舉除本府教  
授有石溪吟藁

秋日

覽物悲搖落傷時厭亂離二毛潘岳賦三峽杜陵詩壁

潤蝸行字窗晴蟻吐絲物情還自適人事苦難期

朱應辰一首

應辰字文奎吳人明初為本府儒學訓導改江  
陰有漱芳集

題管仲姬畫竹

夫人寫竹如寫字不墮畫家蹊徑中料得山房明月夜  
晴窗葉葉動秋風

曹 卷

魯字從善歙人洪武中舉明經授府學訓導遷  
遼府審理

紫陽觀席上作

紫陽山麓神仙家青山繞屋生煙霞枯林風過落黃葉  
寒菊雨餘開白花隻雞斗酒自可樂千駟萬鍾何足誇  
興闌携手過橋去斜日稻田飛亂鴉

王 嘏 一首

嘏字伯純揚州人松江府學訓導

送秦東海法師游上清觀

為愛仙山絕世氛，蒼苔寂寞路難分。  
白羊歲久渾成石，瓊樹春深半是雲。  
洗藥泉香龍蛻骨，吹簫臺迥鶴為羣。  
隱文祕訣無人識，我欲相逢一問君。

鄭真

十二首

真字千之，鄞縣人。洪武壬子鄉試第一，授臨淮教諭。秩滿入京，賜宴陞廣信教授。引年歸，有榮陽外史集。

詩話十之文極為宋潛溪推重裴典簿中嘗屬  
其撰著存堂記別請潛溪為之千之記先成潛  
溪見而歎曰人徒慕吾名爾使我執筆焉能過  
之後數年典簿復請於潛溪答曰有鄭先生記  
在發明洞徹使之獨步可也千之既領解與計  
吏偕除臨津儒學教諭歷九年進牌朝於奉天  
門七奉天殿十四華蓋殿二十七文華殿三武  
英殿一中右門二賜酒饌者十一命賦早朝賜  
宴及續御製菊綻西風露脂楓葉等詩徵貢之  
受恩遇至矣攷明初士于舉于鄉者例稱鄉貢  
進士樊餘慶詩云聖代新開進士科而千之送  
閩人黃彥機詩亦云兩省同年進士科是也如  
南海孫黃番禹李德皆鄉貢進士而緝地志者  
削去鄉貢字竟稱進士後人因之不察遂謂黃  
中洪武三年進士不知洪武三年第下科舉之  
詔以是年八月為始未嘗會試天下士後雖下



三年疊試之詔惟辛亥有登科進士爾此一誤也嘉興湖州二府明初屬之直隸故實錄於洪武九年十二月書直隸湖州嘉興諸府水災遣戶部主事趙乾等賑給十一年五月敕工部定歲造軍器之數其書湖州嘉興亦冠以直隸字至十四年四月復置巡檢司嘉興府一嘉興縣之杉青牯湖州府三烏程縣之後潘德清縣之下塘新市仍以直隸文冠之考是年十一月始以二府改隸浙江布政司故千之改同年錄云洪武壬子秋浙省承詔旨合九郡之士試之得四十名上諸京師又送何本道還金華序云洪武五年詔命三年疊試於是浙江所屬九郡以其名上之行省而金華何本道與焉其云九郡者嘉湖二府斯時尚屬南畿不在其內也庚戌鄉試中式相傳嘉興則有許信孚俞志文馬思明王錦毛永昇潘椿年朱楨王貞海鹽則有盛

潛德清則有王軫此當載於南國賢書不當載  
 於浙江登科錄顧張氏朝瑞宜書而不書陳氏  
 汝元不當書而書又一誤也壬子浙闈十之名  
 居第一是科四十人中式故王用吉詩云桂籍  
 題名四十人明州自鄭真外有郭可學樊餘慶  
 黃夢熊顧厯王振王廷直王用吉孫原仲吳倫  
 陳希貢汪義方何搯陳仲賢汪瓚共一十五人  
 若陳氏所載鄞縣王藹王道顯二人明州府鹿  
 鳴宴不之及我不敢信也又黃自強王景何本  
 道見於千之他文上虞李繼先烏程陳咨見於  
 府縣志餘若王麟王驥趙惟一杜誼沈新民徐  
 思誠翁希顏俞尚裡駱文凱吳佐俱載陳氏錄  
 中姓名可知者三十人顧陳氏以真倫元仲義  
 方希貢餘慶屬之辛亥科此又一誤也草昧之  
 初舊聞放失總緣修地志者不得其人於古事  
 則芟除之於近事則混書之謫以傳謫若非得

榮陽外史百卷集

何由訂其實乎

北關經楊左丞營

長營何盤盤云是苗徭洞悲哉楊將軍紛紛甲兵弄劍  
收白玉鐔馬按青絲鞚短袴百褶裙前鋒誇勇衆戰功  
稱上多胡為恣貪縱人心失所歸地險馬足用禍機暗  
中發喧然強敵閑彷徨欲何之宛若蟲鼠甕尚能不辱  
身一死誠足慟伯氣久消歇頽基荒草葑我行寒雨中  
塵沙深沒鞞過眼閱盛衰春風吹過夢

龜山水母廟

青山如伏龜，巨石壓晴浪。岡巒相起伏，隱隱城郭狀。憶  
惟南渡餘，金戈嚴保障。封疆南北分，放歌一悽愴。鐵鎖  
錮支祁，禹功千載上。吁嗟水母稱，誰能辨誣謗。

清流關

峩峩清流關，形勝壯淮甸。南來入江海，北去通潁汴。粵  
昔五代餘，諸侯日酣戰。蟠李有餘枝，遐陬寢席奠。設險  
禦中州，紛紛甲兵繕。俄傳點檢來，威聲炎火煽。良將致

生擒面縛轅門獻一笑  
滁州平凱歌  
錫芳宴肆令歐陽  
公登高情眷眷我行入濠梁  
居然腰脚倦前登最上頭  
目力窮視盼前修有佳句  
鑿鑿蒼石片風流  
今百年有如親覲  
面臨流一徘徊  
棲棲雲物變僕夫  
催進程山風  
急於箭

日食詩

辛丑四月朔日有食之  
既氛祲煙雲相盪摩  
天地山川忽蒙翳  
省垣大臣威令傳  
從宮車馬咸紛然  
正笏裁冠

向玉闕辨香百拜哀籲天嗇夫奔馳庶人走叫嘯嘔呼  
亦良久路途錯莫若半夜仰見明星大於斗城中編戶  
百萬家喧闐金鼓紛相撾何物妖蟲肆吞齧奮戈我欲  
凌雲霞人言七政失躔度厯家推演錯昏暮清臺路阻  
兵草深萬里不聞傳救護須臾爭訝紅光還將相公侯  
開笑顏義和重整六龍轡夕陽倒景明西山我年三十  
誠罕見憂國憂家心戀戀九重神聖正當陽天象何為  
召斯變舉頭問天天不言人事祇今殊可憐聖筆昭然

示訓戒春秋二百四十年

寄烏繼善先生

紅心驛外望家山  
颯颯西園兩鬢斑  
鴈書成霜滿地  
飯牛歌罷月臨關  
誤傳海外蘓公死  
終許羌村杜老還  
客舍不知身健否  
何時訪我白雲間

用韻答夏原威述懷

雉堞煌煌壯國都  
移家住近月明湖  
秋風籬落花長好  
夜雪庭階草不枯  
煙遠山庖供晚爨  
雲春野碓急秋租

浮生已付形骸外何羨商巖隱者徒

石梁謠

二首

土塹為家似燕巢秋來風雨怕蕭蕭馬通拾得團成餅  
曬向牆頭作炭燒

東屯西屯雲晝陰上闌下闌淮水深淮水遠從天上去  
美人不見愁人心

王莊驛

日落西山一片霞愁來有路不容遮秋風三徑陶彭澤



正侍南歸看菊花

題李璋梅花

三年為客海東涯  
萬里羅浮一夢賒  
霜月夜寒天地白  
開門曾憶看梅花

題墨梅

先春遠寄墨淋漓  
折得寒香第一枝  
夢遶西湖三月暗  
漆紗窗外影參差

題蘭

國香散落翠巉巖  
靄靄芳叢玉露涵  
楚佩可憐零落盡  
春風春夢過湘南

陳燧一首

燧字民初永嘉人訓導

詩話民初詩不多見送邵鍊師作亦稱具體他如江湖千里去來易故舊一尊離別難正自不俗

送邵鍊師歸江陰

青門隱者人不識  
騎鶴來尋華蓋君  
姹女夜棲丹鼎火

王妃春繡紫衣雲愁聞南國旌旗暗愛聽中天歌吹分  
此去元都舊時路碧桃紅雨正繽紛

陶振一首

振字子昌吳江人徙居華亭洪武中舉明經授  
吳江縣學訓導改安化教諭有釣鼇集

詩話子昌詩多率爾成篇故選家恒置不錄其  
吳王漢長歌云哀吳王汝非他人姓系本卯金  
刀高祖封汝沛五十三城壕冀汝夫牙相制船  
石牢汝胡招致亡命即山鑄錢海水私自熬下  
牧民心蠲賦徭睥睨劉家社稷使動搖汝之初  
有反相高祖臨遣汝訓戒嘗昭昭汝後以子故

失藩臣禮文帝不加戮賜汝几杖老不朝汝之  
未反兵起馳書六國膠東膠西並受招連山大  
澤羅旌旄景帝又殺諫臣錯謝六國復汝削  
地赦汝元惡而頭不汝梟汝胡殺使者不奉詔  
氣並驕鳴呼吳王汝獨不聞前時燕韓盧臨彭  
越剪伐九江王布如蓬蒿胡乃視死輕鴻毛漢  
家除侯將中豪奉揚天兵誅汝曹剗汝腸蹠汝  
血擣汝穴破汝巢汝子授首汝母將安逃致令  
六國灰飛而煙消嗚呼哀吳王汝之罪何滔滔  
千古竹帛猶腥臊斯蓋指斥長陵而作顧紀述  
建文遺事者莫之  
采焉因具錄之

送章彥德游錢塘

錢塘之地何雄哉秀壓元圃超蓬萊大江如龍天際起

山從佛國西飛來雲間三百六十寺含丹凝紫開樓臺  
湧金門前浪花白好峯兩點青如苔宋朝文物已草莽  
荒碑遺碣高崔嵬黃龍白虎消王氣金鳧玉鴈飛寒灰  
鷓鴣浮江去不返渺渺萬里雲濤堆吾生守拙門不出  
結屋低傍山之隈會稽未及探禹穴赤城未及游天台  
每懷此地不得到矯首遐望空徘徊君今遠游別我去  
南風十幅蒲帆開望湖樓前吹鐵笛冷泉亭下傳麈杯  
問君此去何時回安能西子湖頭放歌逐君去一洗胸

中結轡之塵埃

趙宜生

二首

宜生字德純餘姚人洪武初訓導

黃太冲云德純本宗室

子至正中晦迹耕牧自號騎牛野人洪武初舉為鄉邑訓導宗無逸詩往來慰衰暮感慨寧無

同者謂德純也其詩五言學陶七言仿佛李長吉

自輓

二首

嗚呼騎牛人汝往一何速形神如此癯壽命終亦促壯歲即抱病有書不能讀守茲固窮節不能養親祿既無

耕種力靡適水與菽日月忽不淹今晨當就木大化已  
云終何勞妻子哭

先輩多達士後人罔知死苦為聲色迷蚩蚩竟如彼我  
當半百年已悟此中理富貴隨所望貧賤隨所以布衣  
及蔬食適足充諸已修短自由天氣化返為鬼哭者何  
必哀爾豈不然爾田橫有悲歌秋風起蒿里

張庸 一首

庸字熙載江陰人洪武中舉明經授本縣儒學

訓導

江口晚發

四月南風紫楝花  
扁舟春水白鷗沙  
阿儂近住雙涇口  
一趁回潮即到家

林賜一首

賜字

闕二字

莆田人洪武癸酉鄉試第一官溧陽

訓導

題翁石山房



玉澗隨處深羅衣謝時早幽棲同鹿門勝地即蓬島緬  
懷京國游却戀雲山好何日賦歸來相將拾瑤草

高

嵩

一首

嵩字子高閩縣人洪武中教官

立春日題壁

漂泊江淮老廣文昨宵蠻舍又逢春月支二石五斗米  
錄著諸生四十人鄉遠已拚歸夢數身閒不厭在官貧  
笑看朝日盤中味可有青青泮水芹

張時二首

時字敏中錢唐人洪武中訓導有自怡集

詩話張君自怡集鄉里罕傳康熙戊寅客福州從林秀才伺借觀鈔本錄其二首歸詢之武林

者舊未有知其姓氏者矣

匡廬精舍圖

巍哉江上之廬峯東南諸山無與同丹梯石磴杳難度  
層巒疊障相爭雄涼飈翻江吼霹靂嵐光射日開芙蓉  
香爐沉沉紫煙裏瀑布上與銀河通九江秀色在指掌

五老雲氣長鴻濛我昔壯游事歷覽秋濤滿耳來松風  
星子灣頭蕩輕楫石頭渡口聆晨鐘今日披圖倍悽愴  
信知此樂難再逢賢哉公孫慕高隱結屋正在山之中  
詩書滿架恣探討雲林對戶蟠心胸幽禽引雛白日靜  
老鶴叫月秋林空只今公已嚮時用故山可望不可從  
繪為丹青揚坐側傳示藝苑無終窮

### 過枝江縣

近峽江逾窄推蓬路轉斜丹青山外寺紅白雨中花暮

警官船鼓晨吹野戍笳亂雲千萬里何處是京華

林常 二首

常字伯庸永嘉人長史溫之弟本府儒學教授  
風雨過鄱陽湖有感

三月雨多風滿天湖中水高難繫船大魚跳浪白如雪  
好山隔岸青於煙去官莫過彭澤縣讀書擬上匡廬巔  
人生百年苦行樂帝鄉遙遙心自憐

北苑造茶即事

青州州前溪水連殘紅滿川花可憐垂髫何處采茶女  
落日去家呼渡船綠陰青子山雨歇游絲飛絮春風顛  
荒村遠客官舍靜新愁惱人聞杜鵑

陳德甫溪山春曉圖

郭外長溪接遠江磯頭新水白鷗雙萬山雲氣翻春雪  
一枕松聲響夜瀧賓客不徵綺里季子孫終老鹿門龐  
何時我亦來同隱多種桃花映酒缸

邵誼

誼字思宜休寧人洪武中由薦辟授本縣儒學訓導轉黟縣教諭有鉏雲集

春日同諸子郊行

黟縣設自秦至今少城郭人稱小桃源煙霞護叢薄四山如龍蟠蜿蜒分脈絡羣居寡喧囂宇宙覺開廓為問塵網人何如在丘壑

明詩綜卷十五